

সাধু রুইদাস (ব্লাস্টিং মজদুর) চুরুলিয়া গ্রাম

প্রশ্ন : আপনার নামটা বলুন ?

উত্তর : সাধু রুইদাস ।

প্রশ্ন : কি কাজ করেন ?

উত্তর : এমটা কোম্পানিতে ব্লাস্টিং এর কাজ করি ।

প্রশ্ন : আপনি কি সরাসরি এমটা'র স্টাফ ? না কোন ঠিকাদারের আশুারে কাজ করেন ?

উত্তর : না । ঠিকাদারের আশুারে কাজ করি । ঠিকাদার হল অজিত মুদি ।

প্রশ্ন : ওনার বাড়ি কোথায় ?

উত্তর : এই গ্রামের পাশেই ।

প্রশ্ন : আপনারা কতজন এই কাজটা করছেন ?

উত্তর : ১৩ জন ।

প্রশ্ন : কিভাবে কাজটা করেন ?

উত্তর : আমরা লেবার ।

প্রশ্ন : আপনাদের কতক্ষন কাজ করতে হয় ?

উত্তর : আট ঘন্টা ।

প্রশ্ন : প্রত্যেক দিন কাজ করতে হয় ?

উত্তর : হ্যাঁ, যেদিন ব্লাস্টিং হয় না সেদিন গার্ড দিতে হয় । যেখানে ব্লাস্টিং চার্জ হয় সেখানে গার্ড দিই ।

প্রশ্ন : আগে কি করতেন ?

উত্তর : পরের জমিতে মাটি কাটার কাজ করতাম । তারপর এমটায় ঢুকলাম ।

প্রশ্ন : এমটায় কি আগের কাজের চেয়ে মাইনে বেশী ?

উত্তর : না, না । এখানে মাসে ২০০০ টাকা বেতন ।

প্রশ্ন : চাষের কাজ ছেড়ে তাহলে এই কাজে এলেন কেন ?

উত্তর : বর্ষার ধান শুধু ভাল হয় । তা তো বর্ষা ভাল না হলে চাষের কাজ মার খায় । আর চাষের জমি মালিকরা বেচে দিচ্ছে কোম্পানিকে । তাই ঐ কাজ আমাদের কমে গেছে । উপায় নাই তাই এখানে যোগ দিলাম ।

প্রশ্ন : এমটায় কত বছর হল কাজ করছেন ?

উত্তর : ৭-৮ বছর হল ।

প্রশ্ন : কাজটা কিভাবে পেলেন ?

উত্তর : অফিসের দিকে গিয়ে কথা বললাম । ঘরে বসে থেকে তো আর কাজ পাওয়া যায় না । অফিসে গিয়ে বললাম চাষবাস নাই । কাজ-টাজ দিন, নইলে কি করে চলবে ।

প্রশ্ন : আপনি কি একা গেছিলেন ? না, আরও লোক সঙ্গে গেছিল ?

উত্তর : আমরা তিনজন গেছিলাম । তার অফিসের বাবুরা বলল,

আমাদেরও লোকের দরকার তোমরা আজ জয়েন করে যাও । তারপর ব্লাস্টিং এর কন্ট্রাকটর অজিত মুদি আমাদের রেখে নিল ।

প্রশ্ন : আপনার বাবা কি করতেন ? আপনারা কি এখানের আদি বাসিন্দা ?

উত্তর : বাবা চাষবাস করত । হ্যাঁ, আমরা এখানের আদি বাসিন্দা ।

প্রশ্ন : প্রথমে কত টাকা পেতেন ?

উত্তর : প্রথমে ১২০০ টাকা পেতাম । তারপর আস্তে আস্তে বাড়িয়ে ১৫০০, আর এখন ২০০০ পাচ্ছি ।

প্রশ্ন : সপ্তাহে ছুটি আছে ?

উত্তর : ঐ, কাজ করলে রবিবার ছুটি । কিন্তু ওর পয়সা পাব না । মানে কাজ করলে পয়সা ।

প্রশ্ন : আপনাকে কি মালিক Appointment Letter দিয়েছে ?

উত্তর : এতদিনে একটা দিয়েছে । এই একমাস আগে ।

প্রশ্ন : আর পরিচয়পত্র কিছু দিয়েছে ?

উত্তর : না ।

প্রশ্ন : অন্য সুযোগ সুবিধা যেমন, চিকিৎসার খরচ ইত্যাদি পান ?

উত্তর : না । নিজেদের খরচে চিকিৎসা করতে হয় ।

প্রশ্ন : কাজ করতে করতে অ্যান্সিডেন্ট হলে তার দায় কোম্পানি নেবে ? কিছু জানেন ?

উত্তর : আমাদের কোন পরিচয়ই নাই । কোম্পানি স্বীকারই করবে না ।

প্রশ্ন : আজকে যে কাজে গেলেন তার কোন প্রমান থাকে ? মানে কোথাও কি সই করতে হয় ।

উত্তর : না, ওসব কিছু নেই । কোন প্রমানই নেই ।

প্রশ্ন : আচ্ছা, অ্যান্সিডেন্টের ঘটনা কি ঘটেছে ?

উত্তর : না, সেরকম কিছু হয়নি । হলে হয়তো ডাক্তার খরচা ১০-২০ টাকা দিল । নাও দিতে পারে । মর্জিমত হয় ।

প্রশ্ন : পি এফ, মেডিকেল এইসবের পয়সা কাটে ?

উত্তর : গোয়েন্ধাদের ওখানে কাটে । এখানে এইসব নেই ।

প্রশ্ন : মালিককে বলেছিলেন এইসব সুযোগ-সুবিধা দেওয়ার কথা ?

উত্তর : সি পি এম পার্টিকে বলেছি । কিন্তু এখনো কিছু হয়নি ।

প্রশ্ন : আপনাদের নিজেদের কোন ইউনিয়ন আছে ?

উত্তর : না । পার্টির মাধ্যমে কথা বলতে হয় । ইউনিয়ন করার চেষ্টা হয়েছিল । মালিক জানতে পারে কে এইসব চেষ্টা করছে, তো তাকে হাটিয়ে দেয় কাজ থেকে ।

প্রশ্ন : গার্ডের কাজ কোথায় করতে হয় ?

উত্তর : রোডের ধারে । যেখান দিয়ে ডাম্পার যায় ।

প্রশ্ন : এখানে কাজের পরিবেশ কেমন, মানে ঠিকাদার যার আশুারে করেন বা এমটার ম্যানেজমেন্টের ব্যবহার কেমন ?

উত্তর : সবইতো পার্টির উপর । মালিকরা পার্টিকে বুঝিয়ে রাখছে এই করে দেব, সেই করে দেব, পার্টি আবার আমাদের ওটাই বুঝায় । মালিককে

চেপে না ধরলে তো আর কিছু বাড়বে না। কিন্তু চেপে ধরবে কে? সেই লোক তো নেই। পার্টিও তো চাপ দিচ্ছে না, যে ওদের খাটিয়ে ন্যায্য মজুরি দিতে হবে।

প্রশ্ন : ন্যায্য মজুরি বলতে কত বলছেন?

উত্তর : ১০০-১৫০ টাকা উচিত। অন্ত ১০০ টাকা তো হওয়াই উচিত। এখন ১২-১৩ টাকা কেজি চাল। সংসার কি ভাবে চলবে? চাষবাস একটু করি বলে নুন তেল এনে চালিয়ে নিই। ২-৪ বিঘা জমি আছে।

প্রশ্ন : এখানে ই সি এল-এ কাজ করে কেউ আছে?

উত্তর : আমাদের গ্রামে নাই।

প্রশ্ন : ই সি এল-এ কাজ হলে কি ভাল হত?

উত্তর : নিশ্চয় ভাল হত। ই সি এল তো সরকারি।

প্রশ্ন : ই সি এল যারা কাজ করে তারা কি রকম টাকা পায় জানেন?

উত্তর : ৭/৮/১০ হাজার টাকা মাইনে পায়। আরও অনেক ছুটি, সুযোগ সুবিধা পায়।

প্রশ্ন : এই যে, আপনাদের সাথে ই সি এল-এর কর্মীদের এত ফারাক। কেন? আপনার কি মনে হয়?

উত্তর : অত কথা মালিককে জিজ্ঞেস করলে বলবে 'তোমার পোষাছে না তো ছেড়ে দাও।

প্রশ্ন : আচ্ছা, এখানে সরকার থেকে ইনস্পেক্টর আসে? আপনাদের ব্যাপারে খোঁজ নেয় বা আপনাদের সাথে দেখা করে?

উত্তর : আসে, অফিসে যায়। আমাদের উনাদের কোন ভেট হয় না।

প্রশ্ন : আপনি কি মনে করেন সরকারের কোন দায়িত্ব নেওয়া উচিত আপনাদের ব্যাপারে।

উত্তর : হ্যাঁ, উচিত তো।

প্রশ্ন : গোয়েন্দাদের কোম্পানির কোন শ্রমিকদের সাথে আপনার আলাপ আছে?

উত্তর : না।

প্রশ্ন : ওদের ইউনিয়নের কেউ এসেছিল আপনাদের সাথে কথা বলতে?

উত্তর : না, আসে নাই। এক এম.পি. বিকাশ চৌধুরী এসেছিলেন কিন্তু আমাদের ডাকে নি।

প্রশ্ন : আউটসোর্সিং মানে কয়লা তোলায় কনট্রাক্ট ই সি এল অন্য কোম্পানিকে দিয়ে দিচ্ছে। এই আউটসোর্সিং কথাটা শুনেছেন?

উত্তর : না। শুনি নাই।

প্রশ্ন : আপনার ছেলে মেয়ে কত? পড়াশুনো করে?

উত্তর দুটো। একটা মেয়ে বড় ক্লাস ফাইভে পড়ে আর ছেলেটা একদম ছোট।

প্রশ্ন : মেয়েকে কতদূর পড়াবেন?

উত্তর : গরীব ঘরে আর কতদূর পড়াবো।

প্রশ্ন : আপনার কি সাইকেল আছে?

উত্তর : অপস্ট (বোঝা যায়নি)

প্রশ্ন : রেডিও, টি ভি কিছু আছে?

উত্তর : না, কিছু নেই।

প্রশ্ন : আসানসোলে বা বাইরে কোথাও যান পরিবার নিয়ে?

উত্তর : দরকার থাকলে যাই।

প্রশ্ন : কি কি পূজো-পার্বন হয় এখানে?

উত্তর : দুর্গাপূজো হয়। আর বাড়িতে ব্রত করে।

প্রশ্ন : আর দুটো প্রশ্ন আছে। একটা, ব্লাস্টিং এর যা যা সুরক্ষার দরকার তা নেওয়া হয়?

উত্তর : অ্যাক্সিডেন্ট তো খুব হয়না, তাই এটা জানি না।

প্রশ্ন : আপনি কতদূর পড়াশুনো করেছেন?

উত্তর : একদমই করিনি।